

嘉慶乙亥年八月

卮林

蕭山陳氏湖海樓雕本

卮林小語

余無談笑之才平生不解作寒暄語亦未嘗發問難
端稠人廣坐羣議風生余竟默默也知者以爲野鄙
不知者以爲簡傲衆目所攝勉相獻酬顧資之所限
終不可強雖欲有所發明舌未及一伸而詞已跲矣
且夫靈均之謔也而騷韓非之誣也而說長卿之喫
也而賦子雲之蹇也而玄何哉文以杼柚而工不禁
淹思言以縱橫而辨機在捷赴捷而能劇故蹇喫者
無宮商也雖然言之不可以已巧者騁其簧拙者守
其卮卮亦酬世之具也子玄有云滿則傾空則仰非

持故也言者因物隨變惟彼之從非宥坐之卮與余
今是非無主義解繇人因以曼衍故卮林起焉優哉
游哉亦所以窮年也癸未嘉平周嬰識

卮林目錄

卷一

質魚

諮杜

鐫紀

刺顧

難裴

箴王

辨劉

析酈

卷二

續顏

非馬

說孔

贊劉

錄崔

繹李

復杜

疑白

卷三

問歐

釐孫

格鮑

娛張

釋王

附王

彈高

本朱

卷四

述洪

卷五

議郎

論何

解馮

明楊

注王

卷六

廣陳

匡徐

通焦

卷七

洗梅

原謝

申董

商艾

增姚

詮鍾

卷八

諡胡

卷九

諡胡

卷十

諡胡

卮林卷之一

莆田周 嬰方叔纂

質魚

雒水

魚豢魏畧曰漢火行忌水故洛字去其水而加佳
魏爲土德土水之牡也水得土而流土得水而柔
故雒除佳而加水

質曰按左傳遷九鼎於雒邑又伊雒之戎會雒戎至
於雒還及雒館雒汭臨上雒周禮豫州川滎雒周代
已爲雒字豈終始五德之傳周得火德故周忌水而

然乎律歷志以周爲木德春秋无命包後漢禮儀志
亦云是周果木行也水木之母母可忌乎史記夏本
紀踰於雒又伊洛瀍澗東過雒汭導雒自熊耳禹世
已爲雒矣山海經謹舉之山雒水出焉又門水至河
入雒伯益在虞年又已爲雒矣虞土德夏金德也郊
社志又謂夏得木德亦豈忌水而加佳乎新城郭沮
水山海經左傳作睢水睢水在楚楚不忌水何不除
佳漢之受命非始於洛洛之從水何忌之有江淮河
漢四瀆之大者皆不去水而獨更於洛何也高帝建
國曰漢傳之百世避忌宜孰有先者如參之說漢字

便當加佳矣按沈約歷志曰五德更王惟有二家之說雛衍以相勝立體劉向以相生爲義張蒼則以漢水勝周火廢秦不班五德賈誼則以漢土勝秦水以秦爲一代若同蒼黜秦則漢水魏土晉木宋金若同誼取秦則漢土魏木晉金宋火也難者云漢高斷蛇而神母夜哭云赤帝子殺白帝子則漢非火而何斯又不然漢若爲火則當云赤帝不宜云赤帝子也白帝子又何義況乎蓋由漢是土德土生乎火秦是水德水生乎金斯則漢以土德爲赤帝子秦以水德爲白帝子也又按論衡引泉陵紫芝湘水黃龍之瑞從

公孫臣賈誼之言以為漢審土德則安得以為火行

而忌水乎

梁氏玉繩曰經史中洛字作雒陸德明顏師古俱據魚豢魏畧謂漢火行忌水故洛

去水而加佳博物志謂魏復變雒陽為洛陽則雒字東漢所改後遂相仍不盡易也但明史禮志五天啓元年從禮部奏凡水旁加各寫者俱改為雒則今所傳書籍在明光宗以後刻本又必改洛為雒矣金壇段玉裁云豫州之雒从佳雍州之洛从水本是兩字後人混而一之耳

諮杜

歲星

杜元凱注左氏傳襄十八年注曰歲在豕韋二十八年梓慎曰歲在星紀而淫於元枵注曰歲歲星也十八年歲星在亥至此年十一歲故在星紀明

年乃當在玄枵淫行失次也昭九年杜注是歲歲在星紀五歲及大梁自大梁四歲而及鶉火十年裊竈曰今茲歲在顓頊之虛杜曰謂玄枵十一年注曰襄三十年歲在豕韋至今十三年復在豕韋楚靈王弑立之歲歲在大梁到昭十三年歲復在大梁三十二年杜注此年歲在星紀

諡曰歲星者東方木宿之神所在國不可伐可以罰人當居不居國亡所之國昌故左氏好以歲星羸縮占驗襍祥後世疇人世家異教殊術年載次舍往往差池按竹書及年表襄十八年太歲丙午二十八年

爲丙辰昭之九年太歲戊辰五歲則爲壬申自此四歲而爲乙亥昭十年則己巳也襄三十年戊午更十三歲蓋爲庚午靈王弑立即昭元年庚申到十三年太歲壬申杜氏之歷蓋與韋昭同也韋昭國語注曰歲在大火魯僖五年也歲在壽星僖十六年也在大梁二十三年也受實沈之星僖二十四年在鶉尾二十七年復在壽星則僖二十八年也據史記僖五年丙寅十六年丁丑二十三年甲申明年乙酉二十七年戊子明年己丑以韋杜之解推之則太歲在子歲在鶉尾太歲在丑歲在壽星寅在大火卯當在析木

之津辰在星紀已在亥枵午在娵訾未在降婁申在大梁酉在實沈戌當在鶉首亥當在鶉火也故五行志成公五年梁山崩是歲歲在鶉火至十七年復在鶉火年表五年乙亥十七年丁亥又范甯穀梁傳序升平之末歲在大梁蓋升平四年庚申杜氏之說非誕矣然昭九年戊辰旣歲在星紀而三十二年辛卯而亦曰在星紀是自相乖違也且杜全不用太初歷者漢書律歷志曰太初元年歲在星紀婺女六度漢志曰歲名困敦是年太歲丙子王莽傳莽下書始建國五年歲在壽星倉龍癸酉服虔曰倉龍太歲也五

年莽又曰始建國八年歲躔星紀在洛陽之都明年
改元天鳳天鳳元年莽曰更以七年歲在大梁倉龍
庚辰行巡狩之禮厥明年歲在實沈倉龍辛巳卽土
之中案始建國無八年卽天鳳三年天鳳無七年卽
地皇元年莽下書無非好大行詐之詞然始建國五
年通鑑紀實在癸酉天鳳三年歲陰丙子地皇元年
二年則庚辰辛巳如莽言又律歷志漢高祖伐秦繼
周天下號漢歲在東井二十二度鶉首六度也漢志
歲名敦牂太歲在午而天文志漢元年十月五星聚
東井從歲星也此高皇帝受命之符客謂張耳曰東

井秦地漢王入秦五星從歲星聚蓋漢元年丙午也

或誤讀律歷志以八年爲丙午謬耳

以漢書觀之則太歲在子歲星在

星紀太歲在丑歲星在亥枹寅在娵訾卯在降婁辰在大梁巳在實沈午在鶉首未在鶉火申在鶉尾酉在壽星戌在大火亥在析木也故律歷志曰伐桀之歲歲在大火房五度竹書曰其年壬戌志又曰文王受命歲在鶉火張十三度至武王克殷十三年歲亦在鶉火按大雅文王疏曰文王受命改元元年太歲巳未其十三年辛未則孟堅之指伸矣然志又述襄公三十年歲在娵訾三十一年歲在降婁其年戊午

己未且以成公之乙亥丁亥爲歲在鶉火而光武中
興改元建武歲在鶉尾之張度是年乙酉則又午在
娵訾未在降婁酉在鶉尾亥在鶉火是班氏自爲淆
亂也杜豈以班術疏闊故不從之乎。淮南書太陰
元始建於甲寅歲徙一辰廣雅曰太陰太歲也太陰在寅歲名
曰攝提格其雄爲歲星舍斗牽牛太陰在卯歲歲星
舍須女虛危太陰在辰歲歲星舍營室東壁太陰在
巳歲歲星舍奎婁太陰在午歲歲星舍胃昂畢太陰
在未歲歲星舍觜鶻參太陰在申歲歲星舍東井輿
鬼太陰在酉歲歲星舍柳七星張太陰在戌歲歲星